

Cuira, ils 11 d'october 2023

COMMUNICAZIUN A LAS MEDIAS

Studi da tgira cun novas structuradas

En il Grischun ha cumenzà l'emprim studi da tgira a la scola spezialisada superiura tenor il princip dal lieu d'emprendissadi, e quai cun in dumber legraivel da studentas e students. Davos las novas structuradas ed il cumenzament reussì stat ina stretga cooperaziun dals manaschis da tgira, ma era la collavuraziun cun il Center da furnaziun per la sanadad ed ils fatgs socials a Cuira ed il Chantun.

Il cumenzament è reussì

L'atun 2023 ha purtà ina premiera en la scolaziun da tgira en il Grischun: suenter in temp da preparaziun intensiv ha cumenzà l'emprim studi da tgira a la scola spezialisada superiura cun in engaschament sulettamain tras il manaschi. Quai signifitga che las studentas ed ils students n'èn betg pli engaschads dal Center da furnaziun per la sanadad ed ils fatgs socials a Cuira, mabain dals manaschis d'emprendissadi respectivs che als dattan era la paja. En il rom da l'emprendissadi da spezialista resp. spezialist da sanadad è quai gia adina stà il cas. Ins ha damai adattà las duas structuradas da scolaziun sin stgalim secundar e terziar en il Grischun. L'impuls per questa midada ha dà in conclus da la Regenza correspondent l'onn 2021. 75 persunas han accumulà las cundiziuns per cumenzar in studi l'atun. Quai è in dumber legraivel, cunquai ch'ina midada da sistem porta adina era malsegirtad ed ins ha temì ch'il dumber da novas studentas e novs students sa diminueschia pli fitg (vesair era l'illustraziun 1).

Novas incumbensas e schanzas per la bransch

L'engaschament da las studentas e dals students ha dà als manaschis d'emprendissadi – ospitals, servetschs psichiatrics, chasas da tgira ed organisaziuns da spitex – ina nova rolla cun dapli responsablidad. Ins ha creà sis raits da scolaziun regionalas per nizzegiar a moda efectiva las resursas e las concentrar. Nus avain grond plaschair che tut ils champs da lavur èn resguardads sco patruns e che las studentas ed ils students èn repartids bain sin ils manaschis. Cunzunt la gronda dumonda d'engaschament en il sector da la tgira da lunga durada – pia tar las organisaziuns da spitex ed en chasas da tgira – suttastritga l'equivalenza dals champs da tgira. Er il portal d'annunzia sviluprà da nov cun la procedura d'annunzia unitara è sa cumprovà. Quel pussibilitescha a persunas interessadas da tscherner libramain la regiun, ils champs da lavur ed ils singuls manaschis.

Las pajas da las studentas e dals students tanschan per viver

In'ulteriura novaziun da l'engaschament tras il manaschi è ina recumandaziun da la branscha per ina paja minimala da las studentas e dals students che garantescha l'existenza. Quella han ins concepì uschia ch'in studi è pli simpel da financiar e signifitga – tut tenor vegliadetgna – ina paja tranter 2200 francs e 3700 francs al mais, 13 giadas ad onn. Per garantir in tractament equal ha la Regenza dal chantun Grischun decidì dad er adattar las pajas da las studentas e dals students che han cumenzà il studi avant il 2023 e ch'èn damai engaschads da la scola.

Ina campagna fa reclama per il studi

Per far enconuscent il studi ed il nov portal han ins lantschà ina campagna da placats ed ina campagna online. Plinavant han ins organisà occurrenzas d'infurmaziun regionalas per personas interessadas ad in studi. Questas activitads cuntinuesch'ins era l'onni vegnent cun la finamira da gudagnar numerusas studentas novas e blers students novs era per l'atun 2024. Sin fundament da las midadas demograficas e medicinalas vegn la dumonda da servetschs da tgira a crescer vinavant ils proxims onns. Ils manaschis grischuns sa stentan da contribuir lur part cun scolar ina nova generaziun da personas dal fatg.

Illustraziun 1:

Il dumber da las studentas novas e dals students novs è restà stabil

Dumber da novas studentas e novs students da tgira a la scola spezialisada superiura

Onn chalendar	2015	2016	2017	2018	2019	2020	2021	2022	2023
Dumber	62	76	79	84	102	99	64	79	75

Funtauna: Center da furmaziun per la sanadad ed ils fatgs socials, Cuira

Maletg 1:

[Tgi che studegia tgira en il Grischun è da nov engaschè directamain d'in manaschi d'emprendissadi](#)



Maletg 2:

[La nova paja da las studentas e dals students garantescha l'existenza](#)



Maletg 3:

 [Cun quest placat han ins fatg reclama per il studi ed il nov portal](#)



Persuna da contact per ulteriuras infurmaziuns:

Monika Schnoz

co-manadra da fatschenta da la Federaziun grischuna da spitex

tel. 081 252 77 22

info@spitexgr.ch

Federaziun grischuna d'ospitals e da chasas da tgira

La Federaziun grischuna d'ospitals e da chasas da tgira è la federaziun per instituziuns dal sectur da la sanadad e dals fatgs socials da la Svizra Sidorientala. Ella sustegna sias var 100 instituziuns commembras cun 11'700 collavuraturas e collavuratur e represchenta lur interess en la publicitad sco er envers la politica, las autoritads, ils partenaris socials e las assicuranzas.

www.bsh-gr.ch

Federaziun grischuna da spitex

La Federaziun grischuna da spitex è la federaziun tetgala da las 18 organisaziuns da spitex regiunalas dal Grischun. Sco associaziun professiunala e dals patruns sustegna e cusseglia ella sias commembras d'ademplier lur incumbensas. La federaziun funcziunescha sco plattafurma d'infurmaziuns per sias commembras, s'occupa da dumondas relevantas per la spitex e coordinescha incumbensas. Ella tgira il contact cun las autoritads, las assicuranzas da malsauns, las associaziuns chantunalas e federalas ed ulteriuras organisaziuns dal sectur da la sanadad e dals fatgs socials represchentond ils interess da la spitex.

www.spitexgr.ch